



PRIMEIRU  
MINISTRU

**LIAFUAN BADAK HUSI  
PRIMEIRU-MINISTRU TIMOR-LESTE NIAN**

**TAUR MATAN RUAK**

Iha tomada pose membru sira husi  
VIII Governu Konstitusionál

Palásiu Prezidensiál Nicolau Lobato, Díli, Loron 24, fulan-juñu, tinan 2020

S. Exa. Prezidente Repúblika, Sr. Francisco Guterres Lú Olo no Espoza

S. Exa. Prezidente Parlamentu Nasionál, Sr. Aniceto Guterres

S. Exa. Prezidente Tribunál Rekursu, Sr. Deolindo dos Santos

S. Exa. Eis-Primeiru-Ministru Governu Konstitusionál, I no VII nian, Sr. Mari Alkatiri

S. Exa. Prezidente Autoridade Rejiaun Administrativa Espesiál Oekuse Ambenu ("RAEOA") no Zona Espesiál Ekonomia Sosiál Merkadu Timor-Leste nian ("ZEESM-TL"), Sr. Arsénio Paixão Bano

S. Exa. Reverendísima Senhor Bispu sira husi Baukau, Dili no Maliana

Distintu Senhor Membru Parlamentu Nasionál sira

Distintu Senhor Membru Governu sira

Exelentísimu sira

Senhor Prokuradór-Jerál Repúblika

Senhor Xefe Estadu-Maiór Jenerál FALINTIL – Forsa Defeza Timor-Leste

Senhor Komandante Jerál Polísia Nasionál Timor-Leste

Exelentísimu sira

Senhor Representante sira husi Korpu Diplomátiku

Senhor Representante sira husi Ajénsia Internasionál sira

Senhor Representante sira husi Sosiedade Sivíl

Senhor no Senhora sira

Distintu konvidadu sira

Ho haraik an, ha'u mai fila-fali iha Palásiu ida-ne'e hodi partisipa iha serimónia fó pose ba membru Governu sira seluk hodi taka prosesu formasaun Governu Konstitusionál VIII Repúblika Demokrátika Timor-Leste nian.

Ohin ita iha timoroan balu husi timoroan hirak ne'ebé di'ak tebes atu, hamutuk ho sira, ita dezenvolve nasaun ne'e no hetan konfiansa no esperansa Povu Timoroan nian.

Ha'u hatete loloos katak dezafiu ne'ebé iha boot tebes, maibé, karik ita iha konfiansa, forsa ánimu nian no vontade firme atu manán, ita sei alkansa objetivu sira husi promesa hirak ne'ebé governu sira be troka malu tranzmite ona atu transforma Timor-Leste sai nasaun ida ne'ebé Riku, Forte no Seguru, ne'ebé bele alkansa Modernidade no Prosperidade.

Nasaun ida-ne'ebé bele atinje meta no indikadór sira husi dezenvolvimentu nasionál, umanu no ekonómiku ne'ebé prevee ona iha Planu Estratéjiku Dezenvolvimentu Nasionál (PEDN) no iha Roteiru ba Implementasaun Objetivu sira husi Dezenvolvimentu Sustentavel (ODS).

Nasaun ida ne'ebé ita hotu hakarak atu to'o tinan 2030 bele sai nasaun ho rendimentu médiu-aas, ne'ebé labele haluha ka husik hela ninia sidadaun sira nein ida.

País ida ne'ebé oras ne'e, hanesan mós iha tempu uluk, lakohi halo konforme nein lakon-neon bainhira hasoru susar oioin, maibé país ida-ne'ebé enfrenta nafatin ho fiar-metin no determinasaun, dezafiu todan hirak-ne'ebé maihusi katástrofe, dezastres naturais no husi pandemia virus SARS-Cov-2 no COVID-19 daudaun ne'e.

Nasaun ida ne'ebé halibur malu sai ida de'it ba objetivu no prinsípiu komún sira ba melloria no moris-di'ak, ba funu hasoru moris-kiak no nutrisaun la di'al, ba defeza integridade no soberania nasionál sira, ba protesau direitu no liberdade fundamentál hirak-ne'ebé konsagra ona iha Konstituisaun Timor-Leste nian, buka atu transforma difikuldade tomak ba fali oportunidade sira, iha nia moris loro-loron nian, ho serbisu, empenhu, lealdade no dedikasaun.

Senhora no Senhor sira

Distintu konvidadu sira

Iha tempu krize, inserteza no laran-ta'uk atu hasoru loron-aban, prezisa tebetebes lia-tatoli ksolok nian, konfiansa no aten-barani nian.

La kle'ur tan, ami sei apresenta proposta foun kona-ba Orsamentu Jerál Estadu tinan 2020 nian, ho objetivu atu ita kontinua investe nafatin ho ritmu ne'ebé di'ak iha populasaun sira-nia moris-di'ak no iha infraestruturá fundamentál sira hodi dezenvolve nasaun ne'e.

Ami implementa daudaun medida sira iha tempu krize ekonómika no sosiál iha nivel globál, ne'ebé buka kria estabilizasaun no rekuperasaun ekonómika efetiva balu iha país.

Medida konkreta sira, ne'ebé implementa tiha ona iha terrenu, ne'ebé responde ona no sei kontinua atu responde nafatin, bainhira presiza, ba situasaun urjente sira, ba dezastres naturais no ba kalamidade públika sira.

Medida sira kona-ba Apoiu Finanseiru ne'ebé sei hamenus impaktu negativu sira ne'ebé hatodan uma-kain 298,000 (rihun atus-rua sianulu-resin-ualu) resin iha munisípiu hotu-hotu no rejiaun sira.

Maibé mós medida sira kona-ba rekuperasaun estragu sira, rehabilitasaun ba infraestruturas no harii filafali meu esensial hotu-hotu ba ita-nia mobilidade no realizasaun atividade ekonómika no sosial sira.

Membro foun sira husi Governu Konstitusionál VIII ne'ebé ohin simu pose, nu'udar ema hirak ne'ebé mak ita hili loos no sira iha sentidu patriotizmu no nasionalizmu.

Ema loloos hirak-ne'e hetan apoiu adekuaudu atu lidera Medida sira kona-ba Rekuperasaun Sosial no Ekonómika sira, ne'ebé ami prepara daudaun atu apresenta ba nasaun ne'e, ne'ebé fó liu prioridade ba teknolojia foun sira no ba setór sira hanesan ekonomia, edukasaun, saúde no vijilánsia epidemiolójika nian.

Medida hirak-ne'e sei kontribui, ho forma segura, ba Timor-Leste ida ne'ebé "modernu, prósperu no dezvoltadu" liu!.

Ida-ne'e signifika, momoos, katak presiza tebetebes atu hakbesik an liután ba ita-nia sidadaun sira, la'ós de'it atu hatene dimensaun loloos husi dizigualdade no husi problema hirak-ne'ebé mosu iha sosiedade nia leet, maibé mós atu hatán lalais, ho klareza no vizaun, ba sira-nia espetativa no ba dezafiu sira-ne'ebé sira hasoru.

Tanba ne'e, importante tebetebes atu mobiliza vontade institusionál sira, atu apela ba ita-nia sabedoria no intelijénsia tomak tanba ha'u fiar ba Timoroan sira-nia empenhamentu no kapasidade atu hala'o asaun ba ita-nia futuru komún.

Senhora no Senhor sira

Distintu konvidadu sira

Ita simu ona hahii oin-oin husi parseiru sira dezvoltamentu nian, ne'ebé temi kona-ba susesu ne'ebé ita hetan iha kombate hasoru pandemia COVID-19.

Ita kontente tanba to'o ohin loron ita seidak rejistu ema ne'ebé mate tanba moras ne'e no ita konsege ona kontrola surtu ne'e, hodi evita atu moras ne'e hada'et livre iha rai Timor-Leste.

Iha sentidu ida-ne'e, ita haree serbisu maka'as ne'ebé ita-nia profisionál saúde nian sira hala'ó, liu-liu médiku no enfermeiru sira atu kombate hasoru COVID-19. Ita destaka mós papél importante ne'ebé populasaun Timor-Leste halo durante Estadu Emerjénsia nian ne'e, hodi kolabora ho autoridade sira iha asaun prevensaun no kombate nian.

Ita mós labele haluha atu rekoñese apoiu sira ne'ebé ita simu husi nasaun doador sira ne'ebé halo parte iha parseiru dezvoltimentu nian sira, nune'e mós husi Organizasaun Mundiál Saúde nian (OMS), husi ajénsia internasionál sira no organizasaun la'ós governamentál sira, no aproveita mós biban ida-ne'e atu agradese ba sira hotu ne'ebé partisipa iha operasaun boot atu prevene, kontrola, kombate no halo atendimentu ba sidadaun.

Susesu Timor-Leste nian iha kombate hasoru COVID-19 nu'udar susesu hotu-hotu nian.

Ikus liu, ha'u hakarak husik hela mensajem agradementu ne'ebé kle'an no rekoñesimentu públiku ba membru sira hotu Governu Konstitusionál VIII nian, ne'ebé entre fulan-juñu tinan 2018 to'o fulan-juñu tinan 2020, akompaña ha'u iha misaun nobre atu ukun país ida-ne'e, maibé, tanba motivu polítiku, tenke husik hela Governu.

Agradese mós ba sira-nia empenhu, dedikasaun, lealdade no espíritu misaun nian, ne'ebé sira iha bainhira asume dezafiu atu halo parte ba Governu Konstitusionál VIII.

Apresu espesial ida ba sira hotu ne'ebé, tanba forsa sirkunstánsia sira nian, obrigadu atu asume funsaun kumulativa sira, husi pasta governu nian oioin, nune'e mós ba sira ne'ebé asume funsaun ministerial interina nian sira.

Hanesan onra ida serbisu hamutuk ho sira hotu no ha'u aproveita biban ida-ne'e atu hato'o ba sira votu susesu, saúde no prosperiedade nian iha funsaun pública ka privada sira foun, ne'ebé sira atu asume!

Agradese mós ba membru foun ne'ebé hakarak integra iha Governu Konstitusionál VIII, ba período entre tinan 2020 no 2023.

Agradese mós ba sidadaun, ba família, ba comunidade, ba empregáriu, ba parseiru sira dezvoltimentu nian no Organizasaun Naun-Governamentál sira, ba apoiu no konfiansa ne'ebé fó fila-fali ba Governu Konstitusionál VIII.

Ami sei konta nafatin ho imi, ho imi-nia tulun no imi-nia vontade tanba ha'u fiar katak, hamutuk ita sei manán futuru no konkista dezvoltimentu, ba Timor-Leste ida ne'ebé moris iha justisa no igualdade, fraternidade no toleránsia.

Na'i Maromak haraik bénsaun mai ita hotu!

Obrigadu barak